

七十二家集

王纂任中丞集引

任彥昇衿契龍潛提挈之旨  
善譴不渝風雲之感幸矣翊  
戴興運禪讓文多出其手而  
半生勲舊靡列要津豈素淡  
榮利樂爲親臣而不覬爲重

臣故帝亦不復以肩鉅相苦  
耶觀其典郡清貧兒僅食麥  
身不能具裙衫帝詎不堪以  
尙方餘瀝稍爲濡沫則猶之  
山巨源欲者無多與者忘少  
耳龍門晝啓饒所獎拔至今

憶蘭臺聚尚令人神骨奮飛  
焉一片素心元匪責報于後  
嗣之津梁自孝標著論悼世  
王河汾反歸罪任君之不知  
人此中較量不幾於市心哉  
彥昇文三十三卷今存者無

多蒲覺流暉蔭宇較世本微  
有增益云爾

甲子暮春下弦日紹和張爔  
書于舫齋

任中丞集目錄

卷之一

賦

荅陸倕知己賦

陸倕知己賦附

靜思堂秋竹賦

賦體

詩

爲王嫡子侍皇太子釋奠宴

贈王僧孺

荅劉居士

九日侍宴樂遊苑

奉和登景陽山

泛長溪

落日泛舟東溪

濟浙江

贈郭桐廬出谿口見候余旣未至郭仍

進村維舟久之郭生方至

荅何徵君

贈徐徵君

荅劉孝綽

劉孝綽歸沐呈任中丞附

荅到建安餉校

到漑餉任新安斑竹校附

寄到漑

到漑荅任昉附

別蕭諮議



梁武帝荅任殿中宗記室王中書別

附

厲吏人講學

苦熱

同謝朓花雪

出郡傳舍哭范僕射三首

嚴陵瀨

詠池邊桃

聯句

清暑殿聯句栢梁體

卷之二

詔

爲武帝初封功臣詔

求薦士詔

爲武帝追封丞相長沙王詔

爲武帝追封永陽王詔

追封衡陽王桂陽王詔

封臨川安興建安三王詔

爲齊帝禪位梁王詔

璽書

禪梁璽書

冊

禪梁冊

令

爲齊宣德皇后荅梁王令

宣德皇后再敦勸梁王令

爲宣德皇后重敦勸梁王令

敎

爲齊竟陵王世子臨會稽郡敎

卷之三

表

爲齊明帝讓宣城郡公表

爲范尚書讓吏部封侯表

爲褚諮議蔡讓代兄襲封表一

爲褚諮議蔡讓代兄襲封表二

爲褚諮議蔡讓代兄襲封表

爲王思遠讓侍中表

爲皇太子求一日一入朝表

請祀郊廟備六代樂表

爲范始興求爲太宰立碑表

爲梁公請刊改律令表

爲蕭揚州作薦士表

爲蕭侍中拜襲封表

爲吏部謝表

卷之四

彈文

奏彈曹景宗

奏彈劉整

奏彈范縝

奏彈蕭穎達

格

上蕭太傅固辭奪禮格

求爲劉瓛立館格

奉勅示七夕詩格

武帝與任昉詔附

爲王金紫謝齊武帝示太子律序啓

爲卞彬謝脩卞忠貞墓啓

卷之五

牋

到大司馬記室牋

梁國府僚勸進牋

府僚重請牋

書

爲庾杲之與劉居士蚪書

荅河胤書

與江革書

與沈約書

弔樂永世書

策文

天監三年策秀才文三首

序

王文憲集序



文章緣起序

卷之六

議

齊明帝謚議

哀策文

王貴嬪哀策文

碑

丞相長沙宣武王碑

桓宣城碑

墓銘

撫軍桂陽王墓銘

劉先生夫人墓銘

行狀

齊竟陵文宣王行狀

齊司空曲江公行狀

吊文

吊劉文範文

附錄

任昉傳

陳姚察

任昉傳

唐李延壽

廣絕交論

梁劉峻

太常卿任昉墓銘

梁沈約

太常敬子任府君傳

梁王僧孺

贈任昉詩

梁陸倕

贈任黃門二首

梁吳均

遺事

集評

任中丞集卷之一

梁樂安任昉彥升著

明閩漳張爕紹和纂

賦

答陸倕知己賦

原知己之時義故相知之信然乃貪廉之異貫  
素勇怯之相懸貪在物而成累怯在我而可甄  
旣自得於爲御復甘心於執鞭矧相知其如此  
獨攬涕而潺湲雖有望於已知更非謂其知己

信偉人之世篤本侯服於陸鄉緬風流於道素  
襲袞衣與繡裳逮伊人而世載並三駿而龍光  
過龍津而一息望鳳條而載翔彼白玉之雖潔  
此幽蘭之信芳思在物之取譬非升斛而能量  
匹聳峙於東嶽比凝厲於秋霜不一飯以忘過  
每三錢以投渭匪蒙袂之敢嗟豈溝壑之能衣  
旣蘊藉其有餘又澹然而無味得意同乎卷懷  
違方似乎伏氣類平叔而靡雕似子臺而不朴  
冠衆善而貽操綜群言而名學析高戴於后臺

與蘇顏乎董幄探三詩於河間訪九師於淮曲  
術兼口傳之書藝廣鏗鏘之樂時坐睡而懸梁  
讀據梧而錐幄旣文過而意深又理勝而辭縟  
望余生之荏苒追歲暮而傷情測徂陰於堂下  
耳鳴鐘於洛城惟忘年之陸子定一過於班荆  
余獲田蘇之價爾得海上之名信落魄而無產  
終長勤於短生饑虛表於徐步逃責顯於疾行  
子比我於叔則又方余於耀卿心照情交流言  
靡惑萬類闇求千里懸渴言象可廢筌蹄自默

居非連棟行則同車冬夜不長夏日靡餘肴核  
非飢絲竹豈娛我未捨駕子已廻輿中飲相顧  
悵然動色邦壤雖殊離會難測存異山陽之居  
沒非要離之側以膠投膝中離婁豈能識

陸鍾感知已賦附

夜申旦而不寐獨匡坐而怨咨命僕夫而夙  
駕指南館而爲期學窮書府文究詞林旣耳  
聞而存口又目見而登心似臨淄之借書類  
東武之飛翰軫工遲於長卿踰巧速於王粲

固乃度平子而越孟堅何論孔璋而與公幹  
或欲涉其涯涘求其界畔則浩浩漭漭彪彪  
泔泔警長鋏於鞘中若龍淵與蜀漢濟濟冠  
蓋祁祁儻逸有竊風以味道咸交臂而屈膝  
或望路以窺門空升堂而入室彼春蘭及秋  
菊向無絕於衆芳矧重仁與襲義信遼遼兮  
未央言追意而不逮辭欲盡而復忘竊仰高  
而希騏忽脂車而秣馬旣一顧之我隆亦東  
壁之余假似延州之如舊同伯喈之倒屣附



蒼蠅於驥尾託明鏡於朝光謂虛無而爲有  
布籍甚於游揚於是柔條颯其成勁白露變  
而爲霜歲忽忽而適盡憂與愛兮未忘聚落  
莖於虛室聽羈雀於枯楊忤鬱悒其誰語獨  
撫抱而增傷託異人以蠲憂賴奇文而愈疾  
索黃瓊之寄居造安仁之狹室車出門其已  
歡無論銜杯與促膝譬鄒子之吟松故未寒  
而能慄徒納壤以作高陋吞舟而爲網值墨  
子之愛兼逢太丘之道廣陪九萬以齊征激

三千而同上識公沙於梓自拔孝相於無名  
非夫人之爲感孰云感於余情指北芒以作  
誓期鬱鬱於佳城

靜思堂秋竹賦

靜思堂連洞房臨幽沼夾脩篁竹宮豐麗于其  
泉之右竹殿弘敞于神嘉之傍綠條發丹檻翠  
葉映雕梁入房掃文石傍簷拂象牀常生偶蘭  
桂結實值鴛凰逢性與之至道偶斯文之在茲  
歡栢梁之有賦恨相如之異時

賦體

俶征侶兮艤行舟奉君命兮不俟駕屬軒軌之  
易循值堯民之可化慙孺雉之聲朝惡細魚之  
在夜奉玉檢之陸離待金罍之云合

詩

爲王嫡子侍皇太子釋奠宴

以下四言

在昔歸運阻亂弘多夷山襲宇盪海爲家風雲  
改族日月增華欽聖茲遠懷道茲冲踐言動俗  
果行移風進往一簣啓或三蒙冰實因水金亦  
在鎔惟神知化在物立言樂正雅頌咸被后昆  
告奠明祀觀道聖門日月不息師表常尊

贈王僧孺

王僧孺由治書侍御史出爲唐令初僧孺與昉文學友會及是將之縣昉贈詩

惟子見知惟余知子觀行視言要終猶始敬之  
重之如蘭如芷形應影隨曩行今止百行之首  
立人斯著子之有之誰毀誰譽脩名旣立老至  
何遽誰其執鞭吾爲子御劉畧班藝虞志荀錄  
伊昔有懷交相欣勗下帷無倦升高有屬嘉爾  
晨燈惜余夜燭

答劉居士

君子之道亦有其四高行絕俗盛德出類才同  
文錦學非書肆望之可階卽之難至輟精天理

聖象少微人與俗異道與人違庭飛熠燿室滿  
伊威行無轍跡理絕心機

九日侍宴樂遊苑

以下  
五言

帝德峻韶夏王功書頌平共貫汾五勝獨道邁  
三英我皇撫歸運時乘信告成一唱華鍾石再  
撫被絲笙黃草歸維木梯山薦玉榮時來濁河  
變瑞起溫洛清物色動宸眷民豫降皇情

奉和登景陽山

物色感神遊升高悵有闕南望銅駝街北走長

楸埒別澗宛滄溟  
疏山駕瀛碣奔鯨吐  
華浪司南動輕柁  
日下重門照雲開  
九華澈觀閣隆舊  
恩奉圖愧前哲

泛長溪

狗祿聚歸糧依隱謝羈勒  
絕物甘離群長懷思去國  
長溪承東會震區窮水域  
道遇垂綸叟聊訪問津惑  
弭檝申九言無爲累牽縈  
長泛滄浪水平明至臚鼎

落日泛舟東溪



黠黠桑柘繁芑芑麻麥盛交柯溪易陰反景澄  
餘朕吾生雖有待樂天庶知命不學梁甫吟惟  
識滄浪詠田荒我有役秩滿余謝病

濟浙江

昨旦乘輕風江湖忽來往或與歸波送乍逐翻  
流上近岸無暇目遠峰更興想綠樹懸宿根丹  
崖頽久壤

贈郭桐廬出谿口見候余旣未至郭仍進  
村維舟久之郭生方至

朝發富春渚蓄意恐相思  
涿令行春返冠蓋溢  
川坻望久方來萃悲懼不自持  
滄江路窮此湍  
險方自茲疊嶂易成響重以夜猿悲  
客心幸自  
弭中道遇心期親好自斯絕  
孤遊從此辭

答何徵君

散誕羈鞅

一作勒

外拘束名教裏得性千乘同山

林亦朝市勿以耕蠶貴  
空笑易農士宿昔仰高  
山超然絕塵軌傾壺已等樂  
命管亦齊喜無爲

嘆獨遊若終

一作略

方同止

贈徐徵君

外經作吳均者非

僊生悲永路早交傷晚別自我隔容徽於焉徂  
歲月情非山河阻意似江湖悅東臯有儒素查  
與榮名絕曾是違賞心曷用箴余缺眇焉追平  
生座書廢不閱信此伊能已懷抱豈暫輟何以  
表相思貞松擅嚴節

答劉孝綽

孝綽繪之子年十四父黨沈約任昉等  
聞其名命駕造焉昉尤相賞愛天監初  
孝綽起家著作佐郎為  
歸沐詩贈昉昉報曰

閩水旣成瀾藏舟遂移壑彼美洛陽子投我懷  
秋作久敬類誠言吹噓似嘲謔兼稱夏雲盡復  
陳秋樹索詎慰耄嗟人徒深老夫託一作徒然  
老夫諾  
直史兼褒貶轄司專疾惡九折多美疹匪報庶  
良藥子其崇鋒穎春耕勵秋穫

劉孝綽歸沐呈任中丞附

步出金華省還望承明廬壯哉宛洛地佳麗  
寶皇居虹蜺拖飛閣蘭芷覆清渠圓淵倒荷  
芰方鏡寫簪裾白雲夏峰盡青槐秋葉疎自

我從人爵蟾兔屢盈虛殺青徒已汙司舉未  
云書文昌愧通籍臨邛幸第如夫君多敬愛  
蟠木濫吹噓時時釋簿領騶駕入吾廬自唾  
誠礪硃無以儷璠璣但願長閒暇酌醴薦焚  
魚

答到建安餉杖

故人有所贈稱以昂霜筠定是湘妃淚潛灑遂  
隣彬扶危復防咽事歸薄暮人勞君尚齒意祔  
此杖鄉辰復資後坐一作生彦侯余方欠伸獻君

千里笑紆我百憂  
嘖坐適雖有器卧遊苦無津  
何由乘此竹直見平生親

到漑餉任新安班竹杖附

邛竹藉舊聞靈壽資前職  
復有昂霜筠寄生桂潭側  
文彩旣斑斕質性甚綢直  
所以天天真爲有乘危力  
未嘗以過投屢經芸苗植

寄到漑

到漑爲建安太守  
昉寄詩求二彩段

鐵錢兩當一百易  
代名實爲惠當及時無待涼

秋日

到漑答任昉附

予衣本百結閩中徒八蠶假令金如粟詎使  
廉夫貪

別蕭諮議

離燭有窮輝別念無終緒岐言未及申離目已  
先舉揆景巫衡阿臨風長楸浦浮雲難嗣音徘徊  
悵誰與儻有關外驛聊訪狎鷗渚

梁武帝答任昉中宗記室王中書別附

作集卷一  
十一  
問我去何節光風正悠悠蘭華時未晏舉袂  
徒離憂緩客承別酒鳴琴和好仇清宵一已  
曙藐爾泛長洲眷言無歇緒深情附還流

厲吏人講學

暮燭迫西榆將落誠南畝曰余本疎慵頽暮積  
榆柳踐境渴師臣臨政欽益友盱食願橫經終  
朝思擁帚雖欣辨蘭艾何用闢蒿莠

苦熱

旭旦烟雲卷烈景入東軒傾光望轉蕙斜日照



西垣旣卷蕉梧葉復傾葵藿根  
望顰無冷氣披石似懷溫  
霖霖類珠綴喘嚇狀雷奔

同謝朓花雪

土膏候年動積雪表晨暮散葩似浮玉  
飛英若總素東序皆白珩西雖盡翔鷺  
山經陋密榮騷人貶瓊樹

出郡傳舍哭范僕射三首

平生禮數絕式瞻在國楨一朝萬化盡猶我故  
人情待時屬興運王佐俟民英結懽三十載生

苑一交情攜手遁衰寧接景事休明運阻衡言  
華時泰玉階平濬冲得茂彥夫子值狂生伊人  
有涇渭非余揚濁清將乖不忍別欲以遣離情  
不忍一展意千齡萬恨生

已矣平生事詠歌盈篋笥兼復相嘲謔常與虛  
舟值何時見范侯還叙平生意

與子別幾辰經塗不盈旬弗覩朱顏改徒想平  
生人寧知安歌日非君撤瑟辰已矣余何歎輟  
春哀國均

嚴陵瀨

群峰此峻極參差百重嶂清淺旣漣漪激石復  
奔壯神物徒有造終然莫能狀

詠池邊桃

已謝西王苑復揖綏山枝聊逢賞者愛棲趾傍  
蓮池開紅春灼灼結實憂離離

聯句

清暑殿聯句栢梁體

居中有淚寄纓紱

梁武帝

言慙輻輳政無術

新安太守

任昉至德無垠愧違弼

侍中徐勉

爽贊京河豈微物

陽

丞劉洸

竊侍兩宮慙樞密

黃門侍郎柳惺

清通簡要臣豈

汨

吏部郎中謝覽

出入帷宸濫榮秩

侍中張卷

複道龍樓歌

林實

太子中庶子王峻

空班獨坐慙羊質

御史中丞陸杲

嗣以

書記臣敢匹

右軍主簿陸倕

謬參和鼎講畫一

司徒主簿劉洽

鼎味參和臣多匱

司徒左西屬江曹

任中丞集卷之二

梁樂安任昉彥升著

明閩漳張爨紹和纂

詔

爲武帝初封功臣詔

草昧權輿事深締構康俗成務義在庇民自非  
群才並軌文武宣翼將何以啓茲景祚弘此帝  
圖或運籌帷帳經啓王業或攻城略野殉義忘  
生或腹心爪牙折衝禦侮忠勤茂德夷險一致

並宜建國開宇蕃屏王室山河之誓永永無窮

求薦士詔

夫進賢茂賞蔽善明罰前王盛則咸必由之朕  
纂統鴻業寅畏大寶思求俊異協贊雍熙歷聽  
九功物色興皂而白駒盈谷萇楚未刈是以臨  
朝永歎日昃伊佇便可博詢卿士各舉所知將  
量才授能擢以不次庶同則哲之明稱朕急賢  
之旨

爲武帝追封丞相長沙王詔

夫褒崇名器率由舊章光昭德祀永世作則亡  
兄道被如仁功深微管懸諸日月久而彌新故  
能拯龜玉於已毀導涸源於將塞今理運維新  
賢戚並建感惟永遠觸目崩心可追封長沙郡  
王



爲武帝追封永陽王詔

亡兄德履冲粹識業深通徽聲善譽風流籍甚  
道長世短清塵緬邈感惟旣往永慕慟心可追  
封永陽郡王

追封衡陽王桂陽王詔

亡弟暢風標秀物器體淹弘朱方之役盡勤王  
事策出無方物惟不賞亡弟融業行清簡風度  
閑綽蚤優名輦夙廣令聞朕應天紹命君臨萬  
寓祚啓郇滕感興魯衛事生運來永懷傷切暢  
可追封衡陽郡王融可桂陽郡王

封臨川安興建安三王詔

神州帝城冠冕列岳渚宮樊鄧形勝是歸居中  
作衛翼宣戎重隆茲寵號寔允舊章並非親勿  
居惟賢斯授宏朕之介弟早富德譽董一蕃政  
緝是嘉庸國禮家情瞻寄隆重季風頴儔邁誠  
業標簡任居蕃翰政以化成偉體韻淹穆神寓  
凝正經綸夷險參贊王業

爲齊帝禪位梁王詔

夫五德更始三正迭興馭物資賢登庸啓聖故  
帝跡所以代昌王度所以改耀革晦以明由來  
尙矣齊德淪微危亡荐襲隆昌凶虐寔違天地  
永元昏暴取紊人神三光再沈七廟如綴鼎業  
幾移含識知泯我高明之祚耿焉將墜永惟屯  
難冰谷載懷相國梁王天誕睿哲神縱靈武德  
格玄祇功均造物止宗社之橫流反生民之塗  
炭扶傾頽構之下拯溺逝川之中九區重緝四

維更紐絕禮還紀崩樂復張文館盈紳戎亭息  
警浹海寓以馳風聲輪裳而稟朔八表呈祥五  
靈效祉豈止鱗羽禎奇雲星瑞色而已哉勲茂  
於百王道昭乎萬代固以明配上天光華日月  
者也河嶽表革命之符圖識紀代終之運樂推  
之心幽顯共積謳頌之誠華裔同著昔水政旣  
微木德升緒天之曆數實有所歸握鏡璇樞允  
集明哲朕雖庸蔽闇于大道永鑒崇替爲日已  
久敢忘列代之高義人祇之至願乎今便敬禪

于梁卽安姑熟依唐虞晉宋故事

璽書

禪梁璽書

夫生者天地之大德人者含生之通稱並首同  
本未知所以異也而稟靈造化賢愚之情不一  
託性五常強柔之分或舛群后靡一爭犯交興  
是故建君立長用相司牧非謂尊驕在上以天  
下爲私者也兼以三正迭改五運相遷綠文赤  
字徵河表洛在昔勛華深達茲義眷求明哲授  
以蒸人遷虞事夏本因心於百姓殷化爲周實

受命於蒼昊爰自漢魏罔不率由降及晉宋亦  
遵斯典我高皇所以格文祖而撫歸運畏上天  
而恭寶曆者也至于季世禍亂荐臻王度紛糾  
姦回熾積億兆夷人刀俎爲命已然之逼若綫  
之危跼天踏地逃形無所群凶挾煽志逞殘戮  
將欲先殄衣冠次移龜鼎衡保周召並列宵人  
巢幕累卵方此非切自非英聖遠圖仁爲己任  
則鷗臯厲吻翦焉已及惟王崇高則天博厚儀  
地鎔鑄六合陶甄萬有鋒驛交馳振靈武以遐



略雲雷方翦鞠義旅以勤王揚旂旆於遠路戮  
姦宄於魏闕德冠往初功無與二弘濟艱難緝  
熙王道懷柔萬姓經營四方舉直措枉較如畫  
一待旦同乎殷后日昃過於周文風化肅穆禮  
樂交暢加以赦過宥罪神武不殺盛德昭於景  
緯至義感於鬼神若夫納彼大麓膺此歸運烈  
風不迷樂推攸在治五臚於已亂重九鼎於旣  
輕自聲教所及車書所至革面回首謳吟德澤  
九山滅祲四瀆安流祥風扇起淫雨靜息玄甲

遊於芳荃素文馴於郊苑躍於川於清漢鳴六  
象於高崗靈瑞雜沓玄符昭著至於星孛紫宮  
水効孟月飛鴻滿野長彗橫天取新之應旣昭  
華故之徵必顯加以天表秀特軒狀堯姿君臨  
之符諒非一揆書云天監厥德用集大命詩云  
文王在上於昭于天所以二儀乃眷幽明允叶  
豈惟宅是萬邦緝茲謳訟而已哉朕是用擁璇  
沈首屬懷聖哲昔水行告厭我太祖旣受命代  
終在日天祿云謝亦以水德而傳于梁遠尋前

典降惟近代百辟遐邇莫違朕心今遣使持節  
兼太保侍中中書監兼尙書令汝南縣開國侯  
亮兼太尉散騎常侍中書令新吳縣開國侯志  
奉皇帝璽綬受終之禮一依唐虞故事王其陟  
茲元后君臨萬方式傳弘烈以答上天之休命

冊

禪梁冊

咨爾梁王惟昔邃古之載肇有生人皇雄大庭  
之辟赫胥尊盧之后斯並龍圖鳥跡以前恍惚  
杳冥之世固無得而詳焉洎乎農軒炎皞之代  
放勳重華之主莫不以大道君萬姓公器御八  
紘居之如執朽索去之若捐重負一駕汾陽便  
有窅然之志暫是適箕嶺卽動讓王之心故知戴  
黃屋服玉璽非所以示貴稱尊垂大輅建旂旌

蓋欲令歸趣有地是故忘已而字兆人殉物而  
君四海及於精華內竭畚櫓外勞則撫茲歸運  
惟能是與况兼乎笙管革文威圖啓瑞攝提夜  
朗熒光晝發者哉四百告終有漢所以高揖黃  
德旣謝魏氏所以樂推爰及晉宋亦弘斯典我  
太祖握河受曆應符啓運二葉重光三聖係軌  
嗣君喪德昏棄紀度毀紊天綱凋絕地紐茫茫  
九域翦爲仇讎溥天相顧命懸晷刻斯涉剝孕  
於事已輕求雞徵校曾何足譬是以谷滿川枯

山飛鬼哭七廟已危人神無主惟王體茲上哲  
明聖在躬稟靈五緯明並日月彝倫攸序則端  
冕而協邕熙時難孔棘則推鋒而拯塗炭功踰  
造物德濟蒼生澤無不漸仁無不被上達蒼昊  
下及川泉文教與鵬翼齊舉武功與日車並運  
固以幽顯宅心謳訟斯屬豈徒桴鼓播地卿雲  
叢天而已哉至如晝覩爭明夜飛枉矢土淪彗  
刺日旣星亡除舊之徵必顯更姓之符允集是  
以義師初踐芳露凝甘仁風旣被素文自擾比

闕藁街之使風車火徼之民膜拜稽首願爲臣  
妾鍾石畢變事表於遷虞蛟魚竝出義彰於事  
夏若夫長人御衆爲之司牧本同已於萬物乃  
因心於百姓寶命無常主帝王非一族今仰祇  
乾象俯藉人願敬禪神器授帝位于爾躬大祚  
告窮天祿永終於戲王允執其中式遵前典以  
副昊天之望禋上帝而臨億兆格文祖而膺大  
業以傳無疆之祚豈不盛歟

令

爲齊宣德皇后荅梁王令

承固茲謙揖未膺大典敬復雅旨良有憮然夫  
至寂難原言象所絕教思有律感通斯在所以  
異人者神明同人者用合王誕茲上睿對越天  
行德冠二儀化周群動生民以來一人而已但  
達節弘道每濡跡於中庸神照惟幾不抑心於  
鑽仰范宣旣讓其下取則况聖圖睿範歌思是  
歸廉約雖弘慶賞遂替誠賢者悅義長難進之



風不肖者矜功阻竭力之效勸阻之間所差已  
遠王何得不暫紆雅尙允荅天人使朕夜艾以  
安早朝有豫今遣率茲百辟申薦誠款萬致一  
塗煩言可畧

宣德太后再敦勸梁王令

宣德皇后敬問具位夫功在不賞故庸勲之典  
蓋闕施侔造物則謝德之途已寡要不得不強  
爲之名使荃宰有寄公實天生德齊聖廣淵不  
改參辰而九星仰止不易日月而二儀貞觀在  
昔晦明隱鱗戢翼博通群籍而讓齒乎一卷之  
師劍氣凌雲而屈迹於萬夫之下辯折天口而  
似不能言文擅雕龍而成輒削豪爰在弱冠首  
應弓旌客游梁朝則聲華籍甚薦名宰府則延

譽自高隆昌季年勤王始著建武維新締構斯  
在功隆賞薄嘉庸莫疇一馬之田介山之志愈  
厲六百之秩大樹之號斯存及擁旄司部代馬  
不敢南牧推轂樊鄧胡塵罕嘗夕起惟彼狡童  
窮凶極虐衣冠泯絕禮樂崩喪旣而鞠旅誓衆  
言謀王室白羽一麾黃鳥底定甲旣鱗下車亦  
瓦裂致天之屈拱揖群后豐功厚利無得而稱  
是以祥光總至休氣四塞五老游河飛星入昴  
元功茂勲若斯之盛而地狹乎四履勢卑乎九

伯帝有惡焉輜軒萃止今遣某位某甲等率茲  
百辟人致其誠庶匪席之旨不遠而復

爲宣德太后重敦勸梁王令

朕聞匹夫好仁義在麀臚君子行道達斯兼濟  
未有盡器窮神蘊徽章乎天極高奠中樽觀傾  
壘而弗拯惟王德冠往初功無與二四時等契  
兩曜齊明擬度天行取則乾健而運距艱季道  
極百王援義而起一戎大定羅山革草罔不率  
從用使商庭產蒸周闕樹梓傾宮旣散鹿臺靡  
蓄盛德大業巍巍若此日者事岐之號爰發帝  
言殊物備禮率由寡昧雖復雲竿載路清蹕啓

行昭德報功未臻其極而高揖天休遠存克讓  
俾予未亡興慙日昃今遣率茲百辟人致誠請  
庶有感睿心霽然降志

教

為齊竟陵王世子臨會稽郡教

富室兼并前史共蠹大姓侵威徃哲攸嫉而權  
豪之族檀割林池勢富之家專利山海至乃水  
稱峻巖巖我君后崇墉增仞內通神明出符大  
順火炎崑岡神嶽崩潰蘭艾同燼玉石俱碎哲  
人遭命哀有餘慨